



## Ичот чужан мукöд

## ТОПЫД ЙИТÖД

Кольом четвергö уна йöза вöли Сыктывкарса коми культура шöрины, көни кыпид рытпук вылö чукöртчылисны Кörtкерöс районьсь петлём, а öни юркарын олысь войтыр.

Кört Айкалön му вылын чужломаяс 20-ысь унджык во сайын котыртöмаöсь юркарын ассьыныс землячество. Талун сэтчö пырысьыс 200 сайö нин: власьт тэчасын вöвлöм да öния уджалысьяс, велöдысь-бурдöдысьяс, пöрадок видзысьяс, журналистикаын зильысьяс, сьылысь-йöктысьяс, студентьяс.

Та пöрийö аддзысьлёмсö сиисны коми гижысь Михаил Лебедев нима Кörtкерöс районса шөр библиотекалы 115 во тырöмлы да сэни уджалысьяслы.

### Видза олан, земляк!

Рытпуксö котыртисны Сыктывкарын Кörtкерöс районса землячествон юрнуöдысь, «Коми йöзöдчан керкаөн» веськöдлысь Вячеслав Попов, республикаын мортлысь право дорйысь уполномоченной Надежда Быковская да Кörtкерöс районса шөр библиотекаөн веськöдлысь Светлана Челпанова.

Вячеслав Попов чолöмалис гöсьтъясьсö да землячество нимсян сетис библиотекаса директор Светлана Челпановалы уна во топыда ёртасöмысь аттьбалана гижöд, а лыддысьысьяслы выль небöгъяс нёббöм могысь — сьöмтор.

—Меным нимкодъ паньдасьлыны аслам землякъяскöд Сыктывкарын, коми культура шöрины. Юркарын оло Кörtкерöс районьсь петлём уна морт, и накод аддзысьлёмьыс — быттö сөстөм сынöд апыштöм, — пасйис Вячеслав Васильевич.

Библиотекалы козинъяс вичисны и республикаса национальной политика, а сідзжö культура, туризм да архив удж кузя министерствосянь, мукöд гöсьтъянь...

Землячествон вöвлöм веськöдлысь Надежда Быковская неуна висьтальштис, кутшöм удж бергöдисны.

—Медводз вöли чукöртчылам вонас кыкысь. Сувтöдам ас водзаным кутшöмкö торъя мог, а бöрыннас доньялам, мый артмис, а мый эзджык. Сэсся пондiм ветлöдлыны Кörtкерöс районса сикт-грездö, сёрнитны ай-мам кывйöн сэни олысьяскöд. Таво землячество шуис нудны сикт-грездьясьлысь луньяс. Первой рытсö сиам Кörtкерöс-лы, сэсся ветлам Висер вожö. Мөвпалам нудны и Коми Республикаса народной

артистка Лидия Логиновалысь творческой рыт. Сийö лоö аслыспöлс. Сэни Лидия Петровна петкöдчас аслам выль енбиөн, — чуймöдис чукöртчöмаясö Надежда Николаевна.

—Збыль, — залсянь шыöдчис Лидия Логинова. — Рытпук дырйиыс видзöдысьяслы вöзъя донъявны ассьым серпасьясöс (нюмъялö — ред.).

### Юсьлөн югыд олан туй

Сэсся чукöртчöмаяс водзын петкöдчис «ачыс» Михаил Лебедев. Сийöс ворсис Кörtкерöс районса шөр библиотекаын уджалысь, сэтчöс «Анбур» небöг театрын артистальсь Александр Казаринов. Александр Гаврилович коми гижысь нимсян висьталис сьлөн олан туй йылысь.

Микöл Михайло Лебедев, литератураын псевдонимыс — Юсь, чужлома Кörtкерöссын писарлөн семьяын. Гижнысö заводитлöма революцияöдз на. Роч кыв вылын петавлöмаöсь сьлөн «За богом молитва, за царём служба не пропадут», «Последние дни Перми Великой», «Таня Осинина», «Среди медведей» да «В волостном омуте» повесьтъяс...

1920-öд вояс бöрын босьтчöма гижны комиён, йöзöдöма «Кört айка», «Яг морт» поэма-мойдьяс да проза мукöд гижöд. Тэчöма тшöтш кывбур да басняс. Коми войтырлы тöдсаöсь сьлөн «Мича ныв», «Тун», «Настук» опереткаяс, найöс унаысь пуктывлісны сцена вылын. Гижöма Михаил Лебедев и челядылы кывбурьяс. Коми кыв вылö вуджöдöма Александр Пушкинлысь, Иван Крыловлысь, Владимир Маяковскийлысь, Самуил Мар-



шаклысь кывбур-басняс. Коми гижысьяс пыись медводзайн 1939 вося январын Совет власьт пасйöма Лебедевсö «Знак Почёта» орденөн...

### Небöг видзанінлөн 115 вöськов

Кörtкерöс районса библиотека вöсьвöма 1901 вося декабрын, сиктса земской училищелөн öти жырйын.

Кыдзи пасйис рытпуксö нудысь, небöг видзанінын уджалысь Рита Мингелайте, первойсö сэни вöлöма сöмын öти важиник ас вöчöм шкап. Но вочасөн библиотека паськалöма.

1940-öд воясö сиктлөн мир туй бокын сы улö вичмöдöмаöсь кык судтаа важиник пу керка. И сэни лыддысьысьыс пыр вöлöма уна.

1976 вося апрель 12 лун пырöма библиотекалөн историяö сьöд лыдпасөн. Омöль пач вöсна ышнитöма стрöйбасыс. Кусöдчöмаöсь сикткодънас. Мый удитöмаöсь, дерт, петкöдöмаöсь. Но... Библиотека сотчöма кушöдз...

Небöг видзанінлы Советской улича вылысь жö сетöмаöсь выль юрсюянин. Сэтчö лыддысьысьяс вольвлöмаöсь 1991 вöдз. Сэсся библиотека вуджöма вöвлöм КПСС райкомлөн кык судтаа стрöйбаö. И со 25 во нин меститчö сэни.

Медся дыр, 1947-1983 воясö, библиотекунас веськöдлöма Наталья Казакова.

Сы йылысь көрткерöссалөн öнөдз на кольмаöсь зэв шоныд казтылöмьяс. Сöмын öти во библиотекаралöма Вера Можайкина. Водзöстчысь нылöс сэсся корöмаöсь уджавны районса милицияö. Бöринджык сийö лöбма Комиын медводз нывбабаөн, кодлы сетöмаöсь полковник званньö...

Но Вера Дмитриевна, кодлы вöлис жö коми культура шöринö рытпук вылас, висьталис, небöгтö пö öнөдз на радейта.

Михаил Лебедевлысь нимсö библиотекалы сетöмаöсь 1997 вося октябрь 13 лунö сэки Коми Республикаса Юралысь Юрий Спиридоновлөн индöд серти...

### Талун да аски

Талун библиотекаын 25 сюрс небöг, газет да журнал. Лыддысьысьыс матö 3 сюрс. Тані жö тшöкыда котыртлöны концертъяс, нималана роч да коми гижысьяскöд, журналистъяскöд аддзысьлёмьяс, выставка-фестивальяс. Библиотекаын уджалысьяслөн зильöмөн йöзöдис «Кörtкерос — моя Родина малая» книга, Айму вöсна Ыджыд тышын усьöмаясьлы сийм диск, уна мукöдтор. Библиотекаын жö велöдöны окотитысьясöс англичана кывйö, йöзöс гажöдö «Анбур» театр.

Рытпук помын нин Кörtкерöсса небöг видзанінын зильысьяс петкöдчисны кыдз литература персонажьяс.



На лыдын вöліны Михаил Булгаковлөн, Александр Островскийлөн, Николай Гогольлөн, Ганс Христиан Андерсенлөн, Антон Чеховлөн, Борис Васильевлөн да мукöд нималана гижысьлөн геройяс.

—Зэв ыджыд аттьö татшöм шоныд рытысь, — юксис аслам сьлөмкылöмөн Кörtкерöс районса землячество пырысь, Коми АССР-са Верховной Советөн вöвлöм веськöдлысь Юрий Семуков. — Тайö здукъясас быттö томмыла. Аттьö землячестволы! Сиа татшöм жö топыда ёртасöмөн и водзö уджавны.

—Кора прöща, мый неуна сёрмышті, но, чайта да, вои медьюгыд петкöдчöм кежлас, — шыöдчис землякьяс дорас республикаса Госсөветысь комитетөн юрнуöдысь Нина Нестерова (Нина Александровна воис буретш сэк, кор петкöдчисны литератураса геройяс — ред.) — Ме висьтала тьянлы ыджыд чолöм, аттьöбала тайö рытпук вылас корöмысь да козынала ставныдлы чöскыд пувья коми пирöг. Сиа и водзö бура уджавны, чуймöдны Кörtкерöс районьн олысьясöс выль небöгъясөн, концерт-выставкаясөн да фестивальясөн.

Сэсся пöсь тшай чашка сайын пувья пирöгөн да мукöд чöскыд пöжасөн номсасьöмөн, öта-мод костын ёрта сёрниөн сёр рытын нин помасис тайö шоныд аддзысьлёмьыс.

**Александр КУЗНЕЦОВ.**  
Снимокъясыс авторлөн.